

Chè fanmi,

Se te yon ane anpil defi ak chwa difisil, ki teste fòs ak andirans nou genyen lè nou mete ansanm pandan nou t ap fè fas ansanm avèk lenkoni. Nou te oblije reenvante eleman ki alabaz edikasyon piblik nan pi gwo sistèm lekòl nan peyi a, soti nan fason pou moun "ale nan klas," rive nan règleman pou bay nòt, prezans, ak tout bagay nou rankontre sou wout la.

Jodia m ap ekri w pou m mete w ajou sou yon lòt bagay ki esansyèl nan edikasyon pitit ou a: enskripsyon nan lekòl presegondè pou septanm ane pwochèn. Mwen vle remèsye w pou pasyans ou pandan n ap travay depi plizyè mwa nan pale avèk fanmi, ak mennen anpil analiz pou devlope yon nouvo règleman admisyon nan lekòl presegondè ki reponn bezwen difisil n ap viv la. Nouvo règleman sa a pral sipòte eksperyans aprantisaj pitit ou a pi byen, ak eksperyans 70,000 elèv senkyèm ane parèy li, konsènan otòn 2021 an.

Nou fè kèk chanjman nan pwosesis enskripsyon lekòl presegondè ane sa a.

Aplikasyon lekòl presegondè ane sa a pral ouvri semèn 11 janvye a. Lekòl presegondè Depatman Edikasyon Vil Nouyòk (DOE) **pap** itilize dosye akademik, odisyon, oswa lòt egzaminasyon ni evalyasyon pou evalye oswa aksepte elèv ane sa a.

Lekòl yo ap kenbe priyorite pou elèv k ap viv nan distri a, paske nou tande fanmi nan tout vil la ki fè nou konnen yo vle ale nan lekòl presegondè pi pre lakay yo. Si yon lekòl gen plis aplikan pase plas ki disponib, yo pral fè òf avèk yon lotri oaza. Nan yon ti kantite lekòl ki te lanse pwòp pwogram pilòt Divèsite nan admisyon yo, yo pral aksepte gwoup priyorite elèv an premye dapre plan lekòl yo a.

Men poukisa.

Vil Nouyòk gen prèske 200 lekòl presegondè — 40% nan tout lekòl presegondè — ki "egzamine" elèv pou admisyon avèk dosye akademik, odisyon, prezans, dosye disiplin, evalyasyon espesyal, entèvyou, oswa lòt mezi. Yo te konn konsidere dosye akademik ak lòt dosye elèv sa yo apati katriyèm ane pou detèmine si yo apwopriye pou antre nan lekòl la.

Ane sa a, nou pa gen anpil nan enfòmasyon òdinè sa yo pou egzamine akòz efè pandemi an. Eta a pa t bay tès estanda pou elèv katriyèm ane nan ane akademik ki sot pase a. Nou te oblije revize règleman pou bay nòt la akòz fason san parèy dènye ane akademik la te fini an. Nou mete faktè prezans ak lòt règleman kle sou kote pou akomode sikonstans fanmi andire akòz pandemi an. Nan règ jeneral, mezi lekòl sa yo te konn konte sou yo pou pran desizyon pou admisyon yo pa disponib ankò.

Anplis, kòm Chanselye, se responsablite mwen pou m bay edikasyon ki pi bon kalite posib la pou chak timoun, pou yo ka prepare pou sikse, yon vi pwodiktif, ak pou yo gen kapasite ak ladrès yo bezwen pou yo pousuiv rèv yo. Gen inegalite nan vil nou an ak nan sistèm lekòl nou an ki te vin agrave ane sa a avèk enpak san pwopòsyon kriz sante COVID-19 gen sou kominote moun ki pa blan, fanmi imigran nou yo, elèv ki gen paran yo ki pa janm te gen opsyon pou yo travay lakay yo, ak plis ankò. Lè mwen te pale avèk fanmi, elèv, ak lidè nan lekòl ki egzamine dosye yo osijè chanjman posib yo, yo te fè mwen konnen fason règleman sa yo fòme a kapab yon obstak pou objektif sa a pou anpil elèv, paske kritè yo egzamine yo ka gen anpil koneksyon avèk establite yon elèv pou lojman ak estati ekonomik li.

Se poutèt sa, kounye a plis pase jamè, li enpòtan anpil pou nou bay e lòv nou yo avantaj salklas pi enklizif, ki pwouve deja li mache. Anviwònman aprantisaj enklizif yo gen prèv yo ankouraje devlopman ladrès pou panse kritik. Yo lye avèk siksè alontèm ak opòtinite pou lavi epi yo mennen nan plis siksè pou gradyasyon ak pi bon aksè nan rezo sosyal ak pwofesyonèl pou plis elèv.

An reyalite, egzamine dosye elèv senkyèm ane san done, espesyalman nan yon ane si difisil tankou ane sa a, enjis, inegal, ak irasyonèl pou nou kontinye.

Se pa premye fwa yo aplike apwòch sa a.

Retire kondisyon evalyasyon nan admisyon lekòl presegondè yo reyisi nan distri ki deja kòmanse fè sa, tankou nan Distri 15 nan Brooklyn. Senplifye pwosesis admisyon an epi fè vil nou an pi jis se sa menm pou nou fè pou elèv, fanmi ak lekòl, patikilyèman ane sa a.

Nou pral bay konsèy ak yon varyete nouvo resous nan lekòl ak biwo nou yo pou ede ou navige pwosesis la epi jwenn yon lekòl presegondè ekselan pou elèv ou a. Ou ka kòmanse lè ou ale nan [schools.nyc.gov/middle](https://schools.nyc.gov/middle) pou jwenn plis enfòmasyon sou pwosesis la, ak [MySchools.nyc](https://myschools.nyc.gov) pou kreye kont MySchools ou a pou ka prepare lè peryòd aplikasyon an kòmanse. Pa ezite kontakte konseye pedagogik pitit ou a—se li k ap gide w pandan tout pwosesis la. Ou ka kontakte tou yon Sant Byenveni pou (Fanmi Family Welcome Center, FWC) (aprann kòman nan [schools.nyc.gov/WelcomeCenters](https://schools.nyc.gov/WelcomeCenters)) oswa rele 718-935-2009.

Chanjman sa yo montre prensip nou kapab tounen aksyon, epi pa gen règleman, ni fason pou fè yon bagay, ki tèlman pran rasin ou pa ka revize l nan objektif pou sèvi timoun nou yo. Nou kwè nan lekòl k ap sèvi tout timoun, ak nan yon sistèm ki ofri opòtinite egal nan pi bon edikasyon posib la. Nou konnen gen plis bagay pou nou fè, donk n ap antame lòt chitapale avèk kominote lekòl yo pou ede jwenn plis enfòmasyon sou itilizasyon egzamen dosye apre septanm 2021.

Mwen vle remèsye nou tout—soti nan elèv ak fanmi ki te lite pou sa ane sa a, rive nan noumenm ki ap apwoche admisyon lekòl presegondè pou premye fwa atravè enskripsyon pitit ou a pwochènman—pou kolaborasyon nou. Nou ini nan misyon nou pou asire pitit ou a—ak chak nan 1.1 milyon kamarad li—resevwa pi bon edikasyon posib la nan pi gwo vil nan mond lan.

Avèk senserite,



Richard A. Carranza  
Chanselye  
Depatman Edikasyon Vil Nouyòk